

Ғасырлар арманының жетісі!

№49-50 (20 915)

11 желтоқсан,
2025 жыл, бейсенбі



Атырау

Облыстық қоғамдық-саяси газет

- @ Atyrau.gazeti
- atyrau_gazeti@mail.ru
- f Атырау газеті
- www.atr.kz
- «Атырау» газеті
- atyrau_gazeti
- Atyrau_news
- Атырау жаңалықтары



Тәуелсіздік күні

ЕГЕМЕН ЕЛ БОЛУДАН АРТЫҚ БАҚЫТ ЖОҚ. ТӘУЕЛСІЗ ҚАЗАҚСТАН САН САЛАДА АЙТАРЛЫҚТАЙ ЖЕТІСТІКТЕРГЕ ЖЕТТІ: ИННОВАЦИЯЛЫҚ ЖОБАЛАР ІСКЕ ҚОСЫЛЫП, ЭКОНОМИКА ТҰРАҚТАНДЫРЫЛДЫ, ХАЛЫҚТЫҢ ӘЛ-АУҚАТЫ КӨТЕРІЛДІ. МЕМЛЕКЕТ САЯСИ ЖАҢАРУ ЖОЛЫНА ТҮСІП, МЕМЛЕКЕТТІК ИНСТИТУТТАР ҚҰРЫЛДЫ, ШЕКАРАЛАР АЙҚЫНДАЛЫП, ЕЛ ТҰТАСТЫҒЫ ҚАМТАМАСЫЗ ЕТІЛДІ. ҚАЗАҚСТАН ӘЛЕМДЕ ЯДРОЛЫҚ ҚАРУДАН ЕРИКТІ ТҮРДЕ БАС ТАРТҚАН, ЖАҢА АСТАНАСЫН САЛҒАН ТҰҢҒЫШ МЕМЛЕКЕТ АТАНДЫ. ТӘУЕЛСІЗ ДАМУ ЖОЛЫҢДА ЕЛІМІЗ ӘЛЕМДІК АРЕНАДА ӨЗ ОРНЫН НЫҒАЙТЫП, АТА-БАБАМЫЗДЫҢ ҒАСЫРЛАР БОЙҒЫ АРМАНЫ ОРЫНДАЛДЫ. БҰЛ ЖЕТІСТІКТЕРДЕ АЙМАҚТАР, ОНЫҢ ІШІНДЕ АТЫРАУ ОБЛЫСЫНЫҢ ДА ҮЛЕСІ ЗОР.

(Толығырақ 6, 9, 10, 14-беттерде)



Коллажды жасаған Дархан Мұхамбеталиев

*Білім

«Ақ шағаладағы»

Жайық мектебі

АТЫРАУ ҚАЛАСЫНЫҢ «АҚ ШАҒАЛА» ШАҒЫНАУДАНЫНДА «ЖАЙЫҚ» VINOM SCHOOL МЕКТЕБІ АШЫЛАДЫ.

Жаңа оқу орнында екі ауысымда 4 мың оқушы оқытылады. Оқыту бағдарламасы халықаралық тәжірибе негізінде әзірленіп, отандық білім беру моделіне сәйкес жүзеге асырылады. Сабақтардың 80%-ы қазақ тілінде, 20%-ы орыс тілінде жүргізіледі.

— Құрылысы аяқталған мектепті осы жылдың 25 желтоқсанында қабылдау жоспарланған. Оқу процесі 8 қаңтарда толыққанды басталады. Қазір мектепке оқушылар мен мұғалімдерді қабылдау жүргізілуде. Бүгінге дейін 500-ден астам оқушы мектепке қабылдау үшін өтініш білдірген, - деді облыстық білім беру басқармасының басшысы Марат Әбуов.

Мектеп кітапханасында 10 мыңнан астам кітап жинақталған. Мұғалімдер екі кезеңдік конкурс арқылы іріктелген тәжірибелі педагогтардан тұрады. Мұнда инклюзивті білім беру қарастырылған, сондай-ақ оқушылардың шығармашылық және зерттеу жобаларын жүзеге асыруға барлық мүмкіндік жасалып отыр.

Өз тілшіміз

*Құрылыс

Атыраудағы ауқымды құрылыс



АТЫРАУ ОБЛЫСЫНДА 100-ДЕН АСТАМ ӘЛЕУМЕТТІК НЫСАННЫҢ ҚҰРЫЛЫСЫ ЖҮРІП ЖАТЫР.

Аймақта 27 жаңа мектеп, 30-ға жуық медициналық нысан және 27 спорт кешені салынбақ. Сонымен қатар үш өнер мектебінің құрылысы жүргізілуде.

— Қазір 5550 орындық 27 мектептің құрылыс-монтаж жұмыстары және бірнеше балабақшаның құрылысы жүруде. Медициналық нысандар қатарында аудандық ауруханаға жапсаржай салу және дәрігерлік амбулаториялар мен фельдшерлік пункттер бар. Бұдан бөлек спорт кешендері, мәдениет үйлері, ауылдық жерлердегі инфрақұрылым нысандары бой көтеруде. Барлық жобалар 2025-2026 жылдары кезек-кезеңімен пайдалануға беріліп, өңір халқының өмір сапасын жақсартуға бағытталған, - деді облыстық құрылыс, сәулет және қала құрылысы басқармасының бөлім басшысы Дархан Тілепберген.

Биыл облыста 753,9 мың шаршы метр тұрғын үйді пайдалануға беру жоспарланған. Сонымен қатар ірі жобалардың бірі – 12 мың орындық концерт залы мен тарихи-өлкетану мұражайының құрылысы басталды. Екі өрт сөндіру депосы, үш ішкі істер ғимараты және бес шекара бөлiмшесiнiң қоршауларына қатысты да жобалық-сметалық құжаттама әзірленіп жатыр.

Бек АЙДАРӘЛІ



Құрметті Атырау облысының тұрғындары мен қонақтары!

16 желтоқсан – Қазақстан Республикасының тарихындағы айтулы, әрі салтанатты күн. Бұл күні бірнеше жыл бойы тұтас халықтың тағдырын өзгерткен, қазіргі заманғы және егеменді Қазақстанның келбетін айқындаған оқиғалар орын алды. «Теңішевройл» ЖШС ұжымының атынан еліміздің барлық тұрғындарын Қазақстан Республикасының Тәуелсіздік күнімен құттықтаймыз!

Біздің компания да тәуелсіз Қазақстанның төл перзенті болып табылады. 1993 жылы құрылған күннен бастап ТШО ел экономикасының дамуына белсенді үлес қосып келеді. Компания маңызды жобаларды жүзеге асырып, жергілікті тауарлар мен қызметтерге инвестиция салып, әлеуметтік нысандардың құрылысын қолдап, өңірдің тұрақты дамуына бағытталған жаңа бастамаларды енгізуде.

2025 жылы Әлеуметтік инвестициялар бағдарламасы аясында ТШО Атырау облысында денсаулық сақтау, білім беру және азаматтық қоғамды дамытуға бағытталған 20 әлеуметтік жобаға қаржылық қолдау көрсетті. Біз ТШО-ның қосқан үлесі Қазақстан мен өңірдің одан әрі гүлденуіне ықпал етеді деп сенеміз.

Тәуелсіздік күні құтты болсын! Сіздерге және жақындарыңызға бақыт, амандық және зор денсаулық тілейміз!

Уильям Лакоби,
«Теңішевройл» ЖШС
Бас директоры

Қуанышкерей Мұхтаров,
«Теңішевройл» ЖШС
Бас директорының орынбасары

*Денсаулық

Жаңа зертхананың артықшылығы неде?

Облыстық перинаталдық орталығында FISH-микроскоппен жабықталған цитогенетикалық зертханасы іске қосылды. Осыған дейін Даун, Патау, Эдвардс, Тернер және Клайнфельтер синдромдары сияқты кең таралған хромосомалық аномалиялар жүктіліктің 20-сынышы аптасында анықталса, енді оларды жоғары дәлдікпен 12 аптада анықтауға болады. Заманауи зертхананы жабықтау «Бір күн клиникасы» жобасы аясында іске асырылған.

— Атырау облыстық перинаталдық орталығында жүзеге асып жатқан «Бір күн клиникасында» FMF, ISNS, CDC халықаралық стандарттары бойынша сертификатталған генетик және сараптамалық УДЗ дәрігерлері жұмыс істейді. Жаңа микроскоп хромосомалардың санын ғана емес, олардың құрылымы мен өзгерістерін анықтайды. Бұрын көрші облыстарға жіберіп қорытындысын алсақ, қазір өзімізде анықтауға мүмкіндік туды. Біз көрші облыстың пациенттерін де қабылдай аламыз, - деді облыстық денсаулық сақтау басқармасының басшысы Қайсар Абдалиев.

Санжар АЗАМАТ

Атырау қаласы мәслихатының хабарламасы

Қазақстан Республикасының «Қазақстан Республикасындағы жергілікті мемлекеттік басқару және өзін-өзі басқару туралы» Заңының 10-бабының 3-тармағына сәйкес, мәслихаттың кезекті XXXIV-сессиясы шақырылады.

Отетін уақыты: 2025 жылғы желтоқсан айының 18-і, сағат 15.00-де.

Отетін орны: Атырау қаласы, Әйтеке би көшесі 77а, кіші мәжіліс залы.

Сессияның қарауына келесі мәселелер енгізіледі:

1. Атырау қаласының кейбір құрамдас бөліктеріне атау беру және қайта атау туралы;
2. Дамбы, Қайыршақты және Еркінқала ауылдық округтерінің

кейбір құрамдас бөліктеріне атау беру және қайта атау туралы;

3. Атырау қалалық мемлекеттік Кірістер басқармасының 2024 және 2025 жылдың 6 айы бойынша атқарған жұмыстарының қорытындысы туралы;

4. 2026-2028 жылдарға арналған қала бюджеті туралы

5. 2025-2027 жылдарға арналған қала бюджетін нақтылау туралы;

6. Қалаға қарасты ауылдық округтердің 2025-2027 жылдарға арналған бюджетін нақтылау туралы;

7. Атырау қаласының 2026-2030 жылдарға арналған даму жоспарын бекіту туралы;

Атырау қаласының мәслихаты